

# Restitushon i Reskonsiliashon

Den nos komunitat, preokupá pa e plaga di kriminalidat, tur klase di punto di bista ta skeiru. Tin diferensia di opinion tokante influensianan negativo den bida di e kriminal, su motivashon pa e krimen, su sentensia, su rehabilitashon, èts. **Muchu ménos ta papiá tokante e víktima(nan). Kasi nan ta lubidá.** I sigur kasi nada ta papiá tokante **drechamentu di e relashon entre e kriminal i su víktima(nan).**

Talbes e konsepto aki ta zona mas straño ku idioma chines. Ma e ta un konsepto bíbliko...loke Dios ta eksigí! Pa un kriminal di bèrdat por rektifiká e daño ku el a hasi, dos kos mester sosodé:

1) Restitushon. Ora ta trata di vandalismo, ladronisia, djòirait, falsifikashon, labamentu di plaka, èts., Dios ta eksigí pa e malechor kompensá su víktima pa e pèrdida òf daño material.

Beibel ta spesifiká kuantu un ladron mester paga pa su ofensa. Levítiko 6:1-5 ta demandá kompensashon total i un suma adishonal di 20%. Segun Eksodo 22:1-7, si un ladron hòrta un bestia i mat'è, e lo mester paga doño kuater òf sinku bes e balor di e bestia. Pues, si e kabritu hòrtá tin balor di fl. 100, e ladron mester paga doño di e kabritu fl. 400 pa fl. 500. Si e no tin e sèn, e **tin ku traha pa pag'è.** Asta si e doño ta haña su kabritu bèk sano i salvo, segun e teksto aki, e malechor lo mester paga dòbel e balor di e kabritu.

Nos sistema huridiko ta enkarselá e ladron. Ma prizon sin restitushon no ta drecha e relashon. **Restitushon ta hasi loke enkarselashon no por hasi: kompensá e víktima(nan) pa e krimen.** Ademas, restitushon ta benefisiá e malechor. Na lugá di sinta pornada tras di trali, pagamentu di restitushon ta konsientis'è di su maldat i ta dun'è oportunitat pa hasi algu positivo pa rektifiká e daño ku el a kousa.

2) Rekonsiliashon. Segun Beibel, rekonsiliashon ta masha importante! Hesus asta a bisa ku si bo ta na “misa” ora bo ta kòrda ku tin un problema entre abo i un otro hende, Dios no ta aseptá bo adorashon te ora bo a bai “*rekonsiliá ku bo ruman*” (Mateo 5:23-24).

Un asesino, Craig, será pa 14 aña, a afirmá ku e eksperensia mas difisil di su enkarselashon tabata dia ku el a sinta kara kara ku famia di e hòmber ku el a asesiná—i tende di nan boka kon su akto di rabia a destruí nan bida. E enkuentro ku famia di su víktima “a konsientisámi di mi propio kulpabilidad.”

Julius a sinti duele pa su krimen...esta, duele ku polis a gar'è. Ma ora el a reuni ku su víktimanan el a kuminsá “realisá ku esaki por tabata mi mama, tata, ruman.” Na final di e sita, Julius a bisa ku el a sinti “tristeses genuino i a sinti simpatia pa nan.”

Den hopi kaso huridiko, e akusado ni ta papia mes ku su víktima(nan). Asta despues no tin oportunitat pa rekonsiliashon. Ku un sistema asina impèrsonal, e malechor insensibel no ta realisá e doló i trouma pèrsonal ku su krímen a kousa.

Un reunion kara kara ta benefisiá tantu e víktima(nan) komo e kriminal. E víktima(nan) tin chèns pa ekspresá loke nan a sufri, e doló, e rabia, e trouma. Pa e malechor, un enkuentro asina por pon'è sinti e konsekuensia di su akshon i konsientis'è ku e ta pèrsonalmente responsabel pa su krimen...un afekto muchu mas positivo ku kastigu por produsí. E sita tambe ta dun'è chèns pa ekspresá su duele i pidi pordon di su víktima(nan).

Ademas, un enkuentro asina por ta nèl loke ta konsientisá e ofensor ku e mester kambia. Un estudio na aña 1992 a haña ku delinkuentenan hòbennan ku a partisipá den un reunion di rekonsiliashon, tabatin muchu ménos chèns di kometé mas krimen despues ku nan a sali for di prizon.

Enkarselashon so no t'è solushon. Nos por yuda tantu e kriminal komo su víktima(nan) si nos lo adoptá e prinsipianan di restitushon i rekonsiliashon.